



Usomaji wa Biblia Huimarisha

Akili

Kwa kuwa yote yaliyotangulia kuandikwa yaliandikwa ili kutufundisha sisi; ili kwa saburi na faraja ya maandiko tupate kuwa na tumaini.—
Warumi 15:4.

Hakuna kitu kinachotumainiwa kuimarisha akili kuliko usomaji wa Biblia. Hakuna kitabu kingine chenye uwezo wa kuinua mawazo, kutoa nguvu kwa uwezo, kama ukweli mpana na wa kutia moyo wa Biblia. Ikiwa Neno la Mungu lingesomwa kama linavyopaswa kuwa, wanadamu wangukuwa na upana wa akili, na uadilifu wa tabia, ambao hauonekani sana nyakati hizi.

Hakuna maarifa yaliyo imara, yenye uthabiti, yenye mguso kwa wengi, kama yale yanayopatikana kutokana na kujifunza Neno la Mungu. Kama kusingekuwa na kitabu kingine katika ulimwengu wote, Neno la Mungu, likiwekwa katika vitendo kwa njia ya neema ya Kristo, lingeweza kumfanya mwariadamu kuwa mkamilifu katika ulimwengu huu, akiwa na tabia iliyofanywa kufaa kwa uzima wa milele wakati ujao. Wale wanaojifunza Neno, wakilichukulia kwa imani kama ukweli, na kulipokea katika tabia, watakuwa kamili katika Yeye aliye yote katika yote. Ashukuriwe Mungu kwa fursa zilizowekwa mbele ya wanadamu....

Wakati unaotolewa kwa usomaji wa Neno la Mungu na kwa maombi utaleta mara mia kama malipo.

Neno la Mungu ni mbegu iliyo hai, na kadiri mbegu hii inavyopandwa akilini, wakala wa kibinadamu analazimika kuitunza kwa bidii—hatua zinazofuatia za ukuaji wake. Je! Hili lifanyike vipi? Baada ya Neno kupokelewa kwa maombi, linapaswa kutunzwa, na kufikelezwa katika maisha ya kila siku. Linapaswa kuchipua na kuzaa matunda, likitoa kwanza jani, kisha suke, kisha nafaka iliyojaa katika suke.

Haitoshi kuisoma Biblia kama vitabu vingine vinavyosomwa. Ili liweze kueleweka kwa namna iokoayo, Roho Mtakatifu lazima auguse moyo wa asomaye. Roho yule yule aliyelivuvia Neno lazima amvuvie msomaji wa Neno. Kisha sauti ya mbinguni itasikiwa. "Neno Lako, Ee Mungu, ni ukweli" itakuwa ni lugha ya nafsi.

Usomaji wa Neno wa juu juu tu hautatimiza matokeo yaliyopangwa na Mbingu; ni lazima isomwe, na kutunzwa moyoni. Kumjua Mungu hakupatikani bila jitihada za kiakili. Tunapaswa kujifunza Biblia kwa bidii, huku tukimwomba Mungu kwa ajili ya msaada wa Roho Mtakatifu, ili tuweze kuelewa Neno Lake. Tunapaswa kuchukua fungu moja, na kuelekeza akili kwenye kazi ya kufikia wazo ambalo Mungu ameweka katika fungu hilo kwa ajili yetu. Tunapaswa kudumu katika wazo hilo mpaka linapokuwa letu, na mpaka tujue "kile asemacho Bwana"...

Neno la Mungu ni mkate wa uzima. Wale wanaokula na kumeng'anya Neno hili, wakilifanya kuwa sehemu ya kila tendo na ya kila sifa ya tabia, watakuwa imara katika nguvu ya Mungu. Linatoa nguvu isiyo kikomo kwa nafsi, ikikamilisha uzoefu na kuleta shangwe ambazo zitadumu milele (The Signs of the Times, Juni 25, 1902).